

**Siunnersuut uunga: Utaqqalinersiaqarneq pillugu Inatsisartut inatsisaata allanngortinneqarnissaa pillugu Inatsisartut inatsisissaattut siunnersuut aamma siusinaartumik pensionisiat pillugit Inatsisartut inatsisaata allanngortinneqarnissaanut siunnersuut (Utoqqalinersiaqartunut utoqqalinersiat toqqammaviusut qaffanneqarneri, utoqqalinersiat qaffasinnerpaat qaffanneqarneri aamma ilanngaassinnginnermi aningaasat tigummiinnagassat qaffanneqarneri)**

(Isumaginninnermut Sulisoqarnermullu Naalakkersuisoq)

### **Akissut**

(Isumaginninnermut Sulisoqarnermullu Naalakkersuisoq)

### **Aappassaanneerinnineq**

Aallaqqaammut siunnersuummik sukumiisumik suliaqarnermut isumaliuutissiissummullu tunniunneqartumut Ilaqutariinnermut Peqqissutsimullu Ataatsimiititaliap Naalakkersuisut sinnerlugit qujaffiginiarpara.

Siunnersuut atortussanngortinneqarpoq Inatsisartuni amerlanerussuteqartut aalajangiinerat malillugu ukiumut 30 millionit koruunit qaavatigut immikkoortitsisoqassasoq utoqqalinersiaqartut siusinaartumillu pensionisiaqartut atugarisaat pitsanngorsaaviginiarlugit. Taamaattumik pisariaqarsimavoq aningaasat ukua aningaasaqarnikkut tunngavissiat atuuttut iluanni immikkut salliutinneqassasut. Utoqqalinersiaqarneq ukiumut 9.000 kr. qaffappata aamma siusinaartumik pensionisiat ukiumut 5.660 kr. qaffappata tamatumalu saniatigut siusinaartumik pensionisiaqartoq ukiumut 10.000 kr. isertitaqarnerusinnaaguni, Naalakkersuisuniit misigivugut, oqimaaqatigiinneq pitsaanerpaaq angusimallugu.

Utoqqalinersiat qaffaaffigineqarnerat ineqarnermut tapiissutinik, utoqqalinersiaqartunut attartorlutik najugaqartunut, ikinnerusunik pisalernissaq Naalakkersuisuniit eqqumaffigaarput. Utoqqalinersialinnut atugarisaat pitsanngorsarniarlugit Naalakkersuisut sulineranni aningaasat qaffaaffigineqarnerat alloriarneruvoq siulleg.

Taamaattumik ineqarnermut tapiissutinut iluarsaaqqinnermut atatillugu ineqarnermut tapiissutit ilanngaaffigineqartarnerat pillugu unammillernartoq maannakkut Naalakkersuisut misissorpaat.

Tamatuma saniatigut utoqqaat pillugit periusissaq nutaaq sularineqarpoq, utoqqalinersialinnut atugarisaannik pitsanngorsaaviginiarlugit ukkatarinnittoq.

Taamaattoq tamatumunnga atatillugu oqaatigisariaqarpoq, naatsorsuinerit tamarmik takutimmassuk, utoqqalinersiaqartut kalluarneqartut tamarmik siunnersuutip atuutilerneratigut aningaasat nammineq atorsinnaasat amerlissammata. Naak isumaginninnermi ikiorsiissutini allani ilanngaaffigineqarsinnaagaluartut.

Inatsisartuni siunnersuutip siullermeerneqarnerani aamma Ilaqutariinnermut Peqqissutsimullu Ataatsimiititaliap isumaliuutissiissutaani inuuniarnikkut aningaasartuutit qaffasissut unammillernartuunerat tikkuartorneqarput, taakkuli qaffakkiartornerat uagut nakkutigisinnaasata avataani pisunit tunngaveqarput. Inuuniarnikkut aningaasartuutit qaffakkiartortut inuiaqatigiinni tamanik eqquisuupput, kisianni innuttaasunut aningaasarsiakinnerpaanut ingammik sunniuteqartussaallutik.

Inuuniarnikkut aningaasartuutit qaffakkiartortut matussuserneqarnissaannut siunnersuut aamma sunneeqataajumaarpoq. Taamaasillutik Naalakkersuisut eqqumaffigaat inuuniarnikkut

aningaasartuutit qaffakkiartortut inuiaqatigiinni unammillernartuunerat aamma ukiumut pisortanit ikiorsiissutit pillugit aaqqiisarnermut atatillugu immikkut ukkatarineqassasut.

Taamatut oqaaseqaateqarluta Naalakkersuisut inassuteqarput siunnersuut pingajussaanneerpeqarnissaanut akuersissutigineqassasoq.